



Da segar aveva ses bab adina la marcladira cun sai. Gion Giuseppe Riedi gizza sia fautsch sin il baun da batter. Il vischins segan uss cun il trimmer.

FOTOS C. CADRUVI



Anita Hemgartner passenta l'enviern a Gran Canaria – betg pervi da la bell'aura e bella vita, mabain perquai che la Svizra è memia chara.

## Co vivan ins si Tschamut?

Visita als abitants dal vitg il pli en il vest dal Grischun

DA CLAUDIA CADRUVI / ANR

■ **Tschintg u sis personas abiteschan u lavuran si Tschamut – tut tenor co ch'ins dumbra. L'anr ha fatg ina visita spontana. Trais umens ed ina dunna han raquintà da vitas tut differentas.**

En las citads da la Svizra brassenta il sulegl. Las temperaturas en Svizra creschan sin passa 30 grad. Auter si Tschamut. Sin 1650 meters èsi empernaivelet. Il chaud vegn interrut mintgatant d'in lev vent frestgin ch'ins sa senta gist bain. Igl è in di da grond traffic. Autos, campers e motors van tras Tschamut. Velocipedists sa mudregian vers l'Alpsu u laschan filar dad ir engiu.

La schurnalista splunta tar *Gion Giuseppe Riedi*. Igl è il sulet che viva propi sur onn en l'aclaun – sco da nundir il sulet vair Tschamutin.

### Il sulet Tschamutin per propi

Riedi avra l'isch. In fin surrir è da sminar davos ses schnuz marcant. «Ben, ben», di il pur ledi. El possia schon resdar cun la schurnalista. Las nursas haja el vendi avant tschintg onns. Uss fetschia insatgi dad anoragiu il funs. Dad anoragiu? Danunder pia? «Da Rueras.» Si Tschamut vul «anoragiu» dir ora Sedrun u Rueras.

Gion Giuseppe è creschì si cun tschintg soras. Trais fragliuns èn morts da baret. Da ses temp devi ina scola tranter Tschamut e Selva. «Nus eran 39 scolars. Da Selva vegniva in'entira bargiada. Mintgatant gievi tiers ruch.» L'onn da las lavinas han ils scolars stuì ir ora Sedrun per intginas emnas.

L'enviern ha Riedi adina lavurà sin il lift. Fin ch'il bab n'ha betg pli pudì per-



Harleys èn mainsvart da vesair avant il Rheingärtli. L'ustaria vegn frequentada savens da motociclists.

veser il muvel. Suenten la mort da la mamma ha Riedi passa diesch onns rugalà il bab che na vuleva mai ir en l'asil. Uss ch'el sez è vegl fa la vischina mintgatant cumissius per Riedi. Ma l'enviern n'è lezza betg a Tschamut. «L'enviern è lung», di el. «Lungs mais.»

Durant il discurs è d'udir il trimmer d'insatgi che sega ses pustget. Per far la fotografia sesa Riedi sin ses baun da batter. El mussa co che l'indriz da batter fautschs funcziuna. Ses bab battiva la fautsch anc a maun. «Da segar aveva el adina la marcladira cun el.»

### L'enviern a Gran Canaria

Il Rheingärtli è circumdà da geranias. Duas harleys e trais autos stattan sin il parcadi. Sin la terrassa sut ils parisols sesan ils passants ed empostan da mangiar

e da baiver. Els gaudan la vista e la pausa. Ma i sto tuttina ir spert. L'ustiera ha da curren. *Anita Hemgartner* fa tut persula la cuschina, il servis ed il grill. Strusch ch'ella ha envidà ina cigaretta vegn il proxim giast e l'expresso vegn puspè fraid. Ch'i marscha uschè bain na capita betg mintga di.

Hemgartner ha fatg blers onns l'ustiera en il Turgovia. Lura ha ses partenari cumenzà a lavurar en il tunnel d'Alp-Transit ed ella ha tschertgà in'occupaziun en Tujetsch. Damai ch'ella n'eria betg pli ina giuvnetta da ventg onns n'haja quai dà nagut. Ella è sa tschentada si Tschamut ed ha bajegià si ses pitschen manaschi. «Senza agid da bancas!» di ella en tun sitg.

Il Rheingärtli è enconuscent en la scena da motociclists. La liongia che

vegn servida è uschè lunga ch'ella bastass tgunsch per quatter. Era giasts fidaivels da la Turgovia vegnan dapi dudesch onns adina a far visita ad Anita.

Hemgartner ri cun mintgin, anc sch'ella ha tant da far. «Ritg na vegnian ins betg cun far l'ustiera», di ella. Cun ils daners ch'ella gudogna la stad na possia ella betg survivor en Svizra. Perquai passenta ella dapi trais onns l'enviern adina a Gran Canaria.

### In ustier fitg dinamic

Sin ina tabla sper via stattan scrits ils pretschs favuraivels da pernottaziun. Il hotel Rheinquelle na para betg gist grond. Quai cugliuna. «Nus avain 58 letgs ed en la Siala, la dependece da l'hotel, hai anc ina giada plaz per passa trenta personas», di *Armin Giossi*. Cun 26 onns ha el cumprà il manaschi ed ensemen cun sia dunna ha el renovà e fatg marschar l'hotel.

Giossi raquinta cun entusiassem e tschaffen. Cunzunt l'enviern, cura che la via d'autos sur il pass saja serrada, saja quai in ruaus nunditg ed ina bellezza fantastica si Tschamut. L'enviern ha Giossi adina avert sia ustaria. La stad surlaschian ins la fatschenta da passants plitost ad Anita. «I na fa gea nagin senn sche duas ustarias han avert e vegnan da vender be tschintg liongias en di», manegia Armin.

Gist questa flexibilitad è tipica per l'hotelier. Per il solit lascha el vi l'hotel ad entiras gruppas. Quellas pon cuschnar sezzas. Sch'igl è giavischà procuran ils Giossi per las tschaveras. La gronda sala da l'hotel è adattada per festas da societads pli grondas. Sche l'hotel n'è betg occupà cun gruppas u scolas prendan ils

Giossi era passants singuls che fan turas u chavan aur.

Il spectrum da giasts che dorman en la Rheinquelle saja vast, di Giossi. El sez e sia dunna na dorman dentant betg a Tschamut. La saira turnan els a chasa a Sedrun, era sch'i ha dà navadas. Sulet la collavuratura resta sur notg.


### Mo l'enviern a Tschamut

Dapi sia pensiun passenta *Fidel Hendry* quasi dapli temp si Tschamut che a Stansstad (NW). El è creschì si a Sedrun. Avant intgins onns han el e sia dunna cumprà la Tgesa sil Grep ch'era stada ina giada in clavaziel. L'enviern metta Hendry naiv e fa via per ils auters possessurs da chasas da vacanzas. «I dat adina insatge da lavurar», di el.

Gist uss han ils Hendrys da renovar chasa. En il nuegl tegnan els duas aucas – ina specia robusta, ma era rara. La famella è gist londervi da cuar. Forsa datti prest pluschians che van a la tschertga da schnees per las streglias da Tschamut enturn.

«Nus avain ina buna relaziun cun ils auters possessurs da chasas da vacanzas», raquinta *Barbara Hendry*. L'emprim d'avust hajan ins festivà ensemen. Bunamain trenta personas sajan vegnidas. Pervi d'ina menda da la vesida na passenta Barbara betg tant temp a Tschamut sco ses um.

I dat dentant anc in'ulteriura persuna che abitescha blers mais da l'onn en il vitg. Igl è in Talian che aveva maridà ina dunna da qua. La stad va el adina giun Sicilia. L'enviern turna el a Tschamut, nua ch'ins na schela – pervi da l'aria sitga e las chasas bainisoladas – betg tant sco en il sid.



Fidel Hendry metta naiv e fa vias per ils auters possessurs da chasas da vacanzas.



Armin Giossi è hotelier e chatschadur a Tschamut – omaduas chaussas fa el cun passiu.